

INUIT ATAQATIGIIT

INATSISARTUNI



UPA 2024/112

21.05.24.

Peter Olsen

Ilageeqarnikkut qanoq siuarsasinnaanerluta, oqaluffeqarfinnilu sulisut atugaat qanoq pitsanngorsarsinnaaneri pillugu apeqquteqaat aallaavigalugu oqallisissiassatut siunnersuut.

(Inatsisartunut ilaasortaq Aqqalu C. Jerimiassen, Atassut)

Oqaaseqaat:

1721-mi Norskeq palasi Hans Egede nunatsinnut nunnippoq, guutimik nalusuusunut qaammarsaajartorluni, ajoqersuiartorlunilu.

Ullut taakku aallarnerfigalugit nunarput nammineerunnaariartulerpoq, nunasiaataalerporlu; tamatumalu kingunerisaanik ulluinnarni inooriaatsitsigut, kulturitsigut, ileqqutigut aammalumi anersaarsiornerup tungaatigut annertoorujussuarmik sunnerneqarpugut.

Naatsumik oqaatigalugu; iloqqorisatta tungaatigut, kulturikkullu kingornussimasatta tungaatigut, avatitsinniit nunasisunit annertuumik tatineqarnitsigut, nunasiaateqalersullu kulturitsinnut tunngasumik killilersuilerneratigut – inerteqquteqalerneratigullu, kulturikkut, ileqqutigullu kingornussimasatsigut annertuumik annaasaqarsimallutallu arsaartugaasimavugut. Annertuumik kinaassusiagaasimalluta.

Qanittunnguamut allaat tikillugu puttalarsineqartalerlutik soorlu; meeqqat pinngitsaalillugit qallunaat nunaannut aallartitaasarsimanerannut tunngasoq, inatsisigut ataataqanngitsunut tunngasoq, pinngitsaaliilluni naartunaveersaasersuisimanernut tunngasut, illoqarfimmit illoqarfimmut allamut nuutsitaanerit allarpassuillu. Timikkut anersaakkullu annertuumik inuiaqatigiinnut uagutsinnut annertuumik ikiligaasimanitsinnik kinguneqarsimasut.

Taamaattumik upperisaq aammalu ilagiit eqqartorneqaleraangata Inuit Ataqatigiinniit eqqarsaaterpassuit, isumaliutersuuterpassuillu amerlasoorpassuit qaffakaalersarput, ajunngitsut ajortullu.

Taamatut aallarniuteqalaarluta, Aqqalu C. Jeremiassenip oqallissaarutaanut qujavugut.

Ullumikkut takornartaajunnaarpoq ilageeqarnerup iluani aaqqitassarpassuaqarlatalu suliassarpassuaqaratta, soorluttaaq suliassaqarfippassuit aamma allat assigalugit taamaattoq.

Ilaageqarnerup iluani unammilligassarpassuaqarpugut; pingartumillu ajoqit aamma pattattoqarniarnerup tungaatigut annertuumik unammilligassaqarpugut.

Palaseqarniarnerput ajorpallaarujuussuannilaq, tassami atorfinniit 25-ninngaaniit inuttaqanngitsut taamaallaat pingasuupput. Qasigiannguani, Ittoqqortoormiuni aammalu Nanortalimmi taamaallaat palasinik amigaateqarluta.

Taamaattoq Biskopip oqaloqatignerani uagutsinnut apuunneqartoq tassaavoq atorfiiit ullumikkut 25-isut, atorfinnut normeringinut 30-inut amerlineqarnissaat kissaatigineqarluartoq, ilaatigut mittarfissuaqalerpat mittarfissuarni aammalu utoqqaat illuinut, napparsimavinnut aammalu ilaatigut parnaarussivinnut immikkut palaseqalernissaa kissaatigineqarluarluni.

Oqariartuutit ilaat allaat tassaalluni, aningaasaliissutigineqartartut ikippallaarnerat pissutaalluni sulisorisanut pikkorissaasarnermut tunngasut sipaarniarfigineqartalersimallutik.

Palasit illui aserfallappallaalersimapput, pingartumillu Nanortalimmi aamma Illoqqortoormiuni soqarpalunngilarluunniit.

Ukioq manna ilagiit sinniseqarneq ukiuni 60-nngortorsiopoq, kissaatigineqarporlu inatsisaamik nutarterinissamut piffissanngortoq. Oqaatigineqartut ilagaat Biskop ullumikkut pissaneqarpallaartoq – qangatut – kissaatigineqarlunili demokratiskiunerusumik ingerlatsisoqalernissaanik, imaappoq ilagiit aamma oqartussaaqataanerulernissaannik ujartuisoqalersimalluni.

Naatsumik eqikkaassagaanni;

Nunatsinni palasissaaleqisoqarpallaanngilaq, tassuunakkut ajornartorsiuteqarnerput ajorisassanngitsutut oqaatigisariaqarpoq, tassami atorfinniit 25-niit inuttaqangitsut taamallaat pingasummata. Sineriassuatsinni palasissaaleqisoqannginggaqappoq tamannalu nuannaarutissaavoq annertooq. Taamaattorli allarluinnaavoq ajoqebarnermut aammalu pattattoqarnermut tunngatillugu.

Ajoqitut atorfiiit 67-iupput, taakkunanngalu amigaatigineqarput 26-it taavalu pattattut eqqarsaatigalugit aamma atorfiiit 67-iupput, taakkunanngalu amigaatigineqarlutik 38-it.

Imaappoq, ajoqitut inuttalerneqarsinnaasuni affai inulaarlugit amigaatigaagut pattattutullu inuttalerneqarsinaasuni affai sinnilaarlugit amigaatigineqarput. Imaappoq ajoqebarniarnikkut aammalu pattattoqarniarnikkut nunatsinni annertuumik unammilligassaqarpugut.

Ajoqinngorniarlutik aallartissimapput aqqanillit, massakkullu ilinniartut arfiniliinnangorsimallutik. Organistinngorniarlutik aallartissimapput qulingiluat, massakkullu ilinniartut arfineq marluinnangorsimallutik.

Unnilu pattattunngorniartartut (organistinngorniartut) affaannaat tiguneqartartut aningaasassaaleqineq pissutaalluni.

Sorpassuit uani tikissinnagaluarpagut, kisiani naatsumik eqikkassagaanni, ilageeqanerup tungaatigut alloriaqqinnissami, ineriartoqqinnissamullu aporfik anneq tassaasorinarpoq ilageeqarnermut aningaasaliissutaasartut ullumikkut annikippallaalersimanerat.

Taamatut oqaaseqarluta Inuit Ataqatigiinnit Aqqalu C. Jeremiassenip oqallissaarutaanut qujavugut.

Qujanaq

Peter Olsen

Inuit Ataqatigiiit